

通志卷第一百六十七

宋 右廸功郎 鄭樵 漁仲 撰

孝友傳第一

晉史始立孝友傳宋齊周隋曰孝義梁陳曰孝行
後魏曰孝感今總曰孝友東漢雖不標名然毛義
一卷而其事已具其中故取之以冠此篇之首又
自宋以下離其義行者爲一宗以附各代孝友之
後庶有別云

後漢孝友

毛義

薛包

劉平

王望
王扶

趙孝

王琳
兒萌

魏譚

車成淳于

恭

江革

劉般

子愷愷子茂

周磐

蔡順趙咨

晉孝友

李密

盛彥

夏方

王裒

許孜

子庾

袁

孫

晷

顏含

劉殷

王延

王談

桑虞

何琦

吳達

宋孝友

劉瑜

董陽

賈恩

郭世道

子原平

潘綜

陳遺秦綿

張楚

邱

傑

師覺授

王彭

蔣恭

孫法宗

許昭先

余齊人

孫棘

徐元妻許錢延慶

何子平

崔懷順

宋義行

嚴世期 吳慶之 徐耕嚴成王 范叔孫吳國夫

齊孝友

王虛之顧昌衍 江蕭叡明鮮于文宗 蕭矯妻

羊羊緝女 佩任吳康之妻 趙氏蔣儁之妻 黃氏吳翼母 丁氏丁長子婦 王氏陳氏三

濟妻姚氏屠氏女 乘公公孫僧遠 吳欣

之童超 孫淡 華寶薛天生 劉懷允解叔謙 宗

卿庾震 朱文濟匡 韓靈敏劉渢 弟謙 夜

吳達之蔡曇智 王文殊樂頤 弟預 江泌 杜

栖剡縣 庾道愍

齊義行

韓係伯

聞人

封延伯

陳元子徐生之

邵榮興

文獻叔李聖伯

范道根

譚弘寶

何弘

陽黑頭

王續祖

郝道福

梁孝友

滕曇恭

徐普濟張悌

庾黔婁

劉霽

劉曇淨

何炯

陶季直

沈崇僚

荀匠

吉玢

甄恬

趙

拔扈

韓懷明

褚脩

張景仁

宛陵女子

劉景

昕

陶子鏘

成景儁

李慶緒

謝蘭

庾沙彌

江紉

陳孝友

殷不害

弟不佞

謝貞

司馬暲

子延義

張昭

弟乾元

後魏孝友

趙琰

長孫慮

乞伏保

孫益德

董洛生

楊引

閻元明

令狐仕皇甫
奴董吐渾

吳悉達

崔承宗

王續

生

李顯達

倉跋

張昇

王崇

郭文恭

後魏義行

石文德

趙令安
孟蘭疆

馬八龍

門文愛

石祖興

邵

洪哲

李几

王閭

北齊孝友

北齊不立此傳今取陸卬附此

陸卬

周孝友

杜叔毗

荆可

秦族弟榮先

皇甫遐

張元

隋孝友

田德懋

薛濬

王頌

田翼

楊慶

紐因

子士

雄

劉仕儁

翟普林

李德饒

華秋

徐孝肅

隋義行

郎方貴

郭世儁

後漢

毛義字少節廬江人也家貧以孝行稱南陽人張奉慕

其名往候之坐定而府檄適至以義守令義奉檄而入

喜動顏色奉者志尚士也心賤之自恨來固辭而去及

義母死去官行服後數辟公府爲縣令進退必以禮舉
賢良公車徵遂不至張奉歎曰賢者固不可測往日之
喜乃爲親屈也斯蓋所謂家貧親老不擇官而仕者也
建初中章帝下詔褒寵義賜穀千斛常以八月長吏問
起居加賜羊酒壽終于家

薛包字孟嘗汝南人也好學篤行喪母以至孝聞及父
娶後妻而憎包分出之包日夜號泣不能去至被毆杖
不得已廬於舍外旦而入灑埽父怒又逐之乃廬於里
門昏晨不廢積歲餘父母慙而還之後行六年服喪過
乎哀旣而弟子求分財異居包不能止乃中分其財奴

婢引其老者曰與我共事久若不能使也田廬取其荒
頓者曰吾少時所理意所戀也器物取朽敗者曰我素
所服食身口所安也弟子數破其產輒復賑給建光中
公車特徵至拜侍中包性恬虛稱疾不起以死自乞有
詔賜告歸加禮如毛義年八十餘以壽終
劉平字公子楚郡彭城人也本名曠顯宗時改爲平王
莽時爲郡吏守菑邱長政教大行其後每屬縣有劇賊
輒令平守之所至皆理由是一郡稱其能更始時天下
亂平弟仲爲賊所殺其後賊復忽然而至平扶侍其母
奔走逃難仲遺腹女始一歲平抱仲女而棄其子母欲

還取之平不聽曰力不能兩活仲不可以絕類遂去不顧與母俱匿野澤中平朝出求食逢餓賊將烹之平叩頭曰今日爲老母求菜老母待曠爲命願得先歸食母畢還就死因涕泣賊見其至誠哀而遣之平還旣食母訖因白母曰屬與賊期義不可欺遂還詣賊衆皆大驚相謂曰嘗聞烈士乃今見之子去矣吾不忍食子於是得全建武初平狄將軍龐萌反於彭城攻敗郡守孫萌平時復爲郡吏冒白刃伏萌身上被十創困頓不知所爲號泣請曰願以身代府君賊乃斂兵止曰此義士也勿殺遂解去萌傷甚氣絕有頃蘇渴求飲平傾其創血

以飲之後數日萌竟死平乃裹創扶送萌喪至其本縣
後舉孝廉拜濟陰郡丞太守劉育甚重之任以郡職上
書薦平會平遭父喪去官服闋拜全椒長政有恩惠百
姓懷感人或增貲就賦或減年從役刺史太守行部獄
無繫囚人自以得所不知所問唯班詔書而去後以病
免顯宗初尙書僕射鍾離意上書薦平及瑯琊王望東
萊王扶皆脩身行義應在朝次有詔徵平等特賜辦裝
錢至皆拜議郎並數引見平再遷侍中永平三年拜宗
正數薦達名士承宮郇恁等在位八年以老病上疏乞
骸骨卒於家王望字慈卿客授會稽自議郎遷青州刺

史甚有威名是時州郡災旱百姓窮荒望行部道見饑者裸行草食五百餘人愍然哀之因以便宜出所在布粟給其廩糧爲作褐衣事畢上言帝以望不先表請章示百官詳議其罪時公卿皆以爲望之專命法有常條鍾離意獨曰昔華元子反楚宋之良臣不稟君命擅平二國春秋之義以爲美談今望懷義忘罪當仁不讓若繩之以法忽其本情將乖聖朝愛育之旨矣帝嘉意議赦而不罪王扶字子元掖人也少脩節行客居琅邪不其縣所止聚落化其德國相張宗謁請不應欲彊致之遂杖策歸鄉里連請固病不起太傅鄧禹辟不至後拜

議郎會見恂恂似不能言然性忱正不可干以非義當
世高之永平中臨邑侯劉復著漢德頌盛稱扶爲名臣
云

趙孝字長平沛國蘄人也父普王莽時爲田禾將軍任
孝爲郎每告歸常白衣步擔從長安還欲止郵亭亭長
先時聞孝當過以有長者客掃洒待之孝旣至不自名
亭長不肯納因問曰聞田禾將軍子從長安來何時至
乎孝曰尋到矣於是遂去及天下亂人相食孝弟禮爲
餓賊所得孝聞之卽自縛詣賊曰禮久餓羸瘦不如孝
肥飽賊大驚並放之謂曰可且歸更持米糒來孝求不

能得復報賊願就烹衆異之遂不害鄉黨服其義州郡
辟召進退必以禮舉孝廉不應永平中辟太尉府顯宗
聞其行詔拜諫議大夫遷侍中又遷長樂衛尉復徵禮
爲御史中丞禮亦恭謙行已類於孝帝嘉其兄弟篤行
欲寵異之詔禮十日一就衛尉府大官送供具令共相
對盡歡數年禮卒帝令孝從官屬送喪歸葬後歲餘復
以衛尉賜告歸卒于家孝無子拜禮兩子爲郎時汝南
有王琳巨尉者年十餘歲喪父因遭大亂百姓奔逃唯
琳兄弟獨守冢廬號泣不絕弟季出遇赤眉將爲所捕
琳自縛請先季死賊矜而放遣由是顯名鄉邑後辟司

徒府薦士而退琅瑯魏譚少間者時亦爲饑寇所獲等輩數十人皆束縛以次當烹賊見譚似謹厚獨令主爨暮輒就縛賊有夷長公特哀念譚密解其縛語曰汝曹皆應就食急從此去對曰譚爲諸君爨恒得遺餘餘人皆茹草菜不如食我長公義之相曉赦遣並得俱免譚永平中爲主家令又齊國兒萌子明梁郡車成子威二人兄弟並見執於赤眉將食之萌成叩頭乞以身代賊亦哀而兩釋焉

淳于恭字孟孫北海淳于人也善說老子清靜不慕榮名家有山田果樹人或侵盜輒助爲收採又見偷刈禾

者恭念其愧恥因伏草中盜去乃起里落化之王莽末
歲饑兵起恭兄崇將爲賊所烹恭請代得俱免後崇卒
恭養孤幼教誨學問有不如法輒反用杖自箠以感悟
之兒慙而改過初遭賊寇百姓莫事農桑恭常獨力田
耕鄉人止之曰時方淆亂死生未分何空自苦爲恭曰
縱我不得他人何傷墾耨不輟後州郡連召不應遂幽
居養志潛於山澤舉動周旋必由禮度建武中郡舉孝
廉司空辟皆不應客隱琅邪黔陬山遂數十年建初元
年肅宗下詔美恭素行告郡賜帛二十疋遣詣公車除
爲議郎引見極日訪以政事遷侍中騎都尉禮待甚優

其所薦名賢無不徵用進對陳政皆本道德帝與之言
未嘗不稱善五年病篤使者存問卒於官詔書褒歎賜
穀千斛刻石表閭除子孝爲太子舍人

江革字次翁齊國臨淄人也少失父獨與母居遭天下
亂盜賊並起革負母逃難備經阻險常採拾以爲養數
遇賊或劫欲將去革輒涕泣求哀言有老母辭氣愿款
有足感動人者賊以是不忍犯之或乃指避兵之方遂
得俱全於難革轉客下邳窮貧裸跣行傭以供母便身
之物莫不畢給建武末年與母歸鄉里每至歲時縣當
案比革以母老不欲搖動自在轅中輓車不用牛馬鄉